

**Erngup nukingata innaallagissiornermut atorneqartarnera pillugu Inatsisartut inatsisaat nr. 11, 8. juni 2014-imeersoq**

**Kapitali 1**

*Atuuffia*

§ 1. Inatsisartut inatsisaat erngup nukinganik isumalluutininik innaallagissiornermut atuinissamut, suliassanullu tamatumunnga attuumassutilinnut misissueqqaarnermut atuinermullu atorneqassaaq.

*Imm. 2.* Isumannaallisaaneq, peqqinnissaq, avatangiisit, isumalluutininik atuineq inuiaqatigiinnilu nungusaataannngitsumik atuinissaq eqqarsaatigalugit suliassat, inatsimmut ilaatinneqartut isumannaatsumik, kiisalu pissutsinut nunat tamalaat suleriaaseqarneranni akurisaasunut naleqquttumik naapertuuttumillu suliarineqarnissaat Inatsisartut inatsisaatigut anguniarneqarpoq.

§ 2. Inatsisartut inatsisaat erngup nukinganik isumalluutininut, ukiumut 1 megawatt (MW) taannaluunniit sinnerlugu pilersuisinnaasutut nalilerneqartunut atorneqassaaq.

*Imm. 2.* Erngup nukinganik innaallagissiorfik qinnutigineqartoq annerpaamik 1 MW tikillugu innaallagissiorsinnaappat, erngup nukinganik isumalluutininik misissueqqaarnissamut atuinissamulluunniit qinnuteqaat nukimmik pilersuineq pillugu Inatsisartut peqqussutaat suliarineqassanersoq Naalakkersuisut aalajangiisinnaapput.

**Kapitali 2**

*Misissueqqaarnerit atainerlu*

§ 3. Erngup nukinganik isumalluutit innaallagissiornermut atorneqarnissaannut misissueqqaarnernut atuinernullu Namminersorlutik Oqartussat kisermaassisinnaatitaapput.

§ 4. Erngup nukinganik isumalluutit innaallagissiornermut atorneqarnissaannut misissueqqaarnissamut imaluunniit atuinissamut Naalakkersuisut piumasaqaatinik immikkut ittunik aalajangersaasinnaapput. Misissueqqaarnissamut atuinissamullu akuersissutit immikkoortillugit tunniunneqarsinnaapput.

*Imm. 2.* Atortussiassanik aatsitassanit pisunik atuinermut atatillugu nukissamik tunisassiornermut erngup nukinganik isumalluutininik misissueqqaarnissamut atuinissamullu akuersissutit, suliani taamaattuni oqartussaasut suliaqarnerinut tamarmiusumut atasutut Naalakkersuisunit nalunaarutigineqassapput. Taamaattorli erngup nukinganik isumalluutininik atuinissamut akuersissut aalajangersimasoq Inatsisartut inatsisaat manna malillugu suliarineqassaaq.

*Imm. 3.* Misissueqqaarnissamut imaluunniit atuinissamut akuersissutit malillugit suliaqarnerit Inatsisartut inatsisaat manna, tassunga atatillugu atugassarititaasussatut

aalajangersarneqartut aammalu inatsisit allat sukkulluunniit atuuttut naapertorlugit ingerlanneqassapput.

*Imm. 4.* Qinnuteqartut ataasiakkaat erngup nukinganik isumalluutit pineqartut ilaannaanik atuisussatut naatsorsuutigineqarpata, qinnuteqartunut arlalinnut ataatsikkut imm. 1 malillugu akuersissutinik Naalackersuisut nalunaaruteqarsinnaapput.

**§ 5.** Misissueqqaarnissamut akuersissutit erngup nukinganik isumalluutitut aalajangersimasunut, nunataanilu killeqarfiliussat iluanni atuuttussanngorlugit, aammalu atugassarititaasut Naalackersuisunit aalajangersarneqarsimasut tunngavigalugit nalunaarutigineqartassapput.

*Imm. 2.* Misissueqqaarnissamut akuersissutit ukiut pingasut tikillugit kisermaassisinnaatitaaffinngorlugit tunniunneqassapput. Annertunerusumik misissueqqaarnissaq siunertaralugu misissueqqaarnissamut akuersissutip sivitsorneqarnissaanik Naalackersuisut nalunaaruteqarsinnaapput. Sivitsuinermit piffissap ukiunik pingasunik ilaqqinneqarnissaa akuerineqarsinnaavoq. Piffissaq misissueqqaarnissamut akuersissuteqarfiusoq ukiunit arfinilinnit sivisunerussanngilaq.

*Imm. 3.* Pisinnaatitaaffimmik pigisaqartoq misissueqqaarnissamut akuersissut tunngavigalugu piiaanissamut akuersissummik tunineqarsinnaatitaavoq, piumasaqaatit uku tamarmik naammassineqarsimappata:

- 1) Pisinnaatitaaffimmik pigisaqartup misissueqqaarnissamut akuersissut malillugu misissueqqaarneq naammassisimasussaavaa, aammalu atuinissamut akuersissummik tunineqarnissamut qinnuteqaammi allaaserineqartutut suliassaq naammassisinnaassallugu,
- 2) Pisinnaatitaaffimmik pigisaqartup misissueqqaarnissamut akuersissummi piumasaqaatit naammassisimasussaavai, taakkunungalu misissueqqaarnissamut akuersissut tunngavigalugu atuinissamut akuersissutip nalunaarutigineqarnissaanut piumasaqaatit ilaatinneqarput, aamma
- 3) Misissueqqaarnissamut akuersissutip naannginnerani pisinnaatitaaffimmik pigisaqartoq atuinissamut akuersissummik tunineqarnissamut qinnuteqassaaq.

*Imm. 4.* Akuersissut ingerlatseqatigiiffimmu, pisinnaatitaaffimmik pigisaqartup toqqagaanut tunniunneqarsinnaavoq, tamanna pillugu tak. § 8, imm. 1.

**§ 6.** Pisinnaatitaaffimmik pigisaqartoq suliffik suliallu akuersissummi pineqartut, taakkulu ineneri, taakkunungalu misissuinerup ineneri pillugit nalunaarusianik akuttoqatigiinnik Naalackersuisunut nassiussisassaaq.

*Imm. 2.* Nalunaarusiat paasisutissallu, imm. 1 naapertorlugu pisinnaatitaaffimmik pigisaqartup Naalackersuisunut nassiussai akuersissutip naaneraniit ukiut pingasut tikillugit isertuunneqartussaapput, Inatsisartut inatsisaat manna naapertorlugu allanik aalajangersaasoqarsimangippat imaluunniit akuersissummi piumasaqaateqartoqarsimangippat.

*Imm. 3.* Nalunaarusiornermut kiisalu nalunaarusiamut tassunga atatillugu isertuussinissamut aalajangersakkanik imaluunniit akuersissummi piumasaqaatinik sukumiisunik Naalackersuisut aalajangersaasinnaapput.

§ 7. Atuinissamut akuersissutit erngup nukinganik isumalluutitut aalajangersimasunut, nunataanilu killeqarfiliussat iluanni atuuttussanngorlugit, aammalu atugassarititaasut allat Naalakkersuisunit aalajangersarneqarsimasut tunngavigalugit nalunaarutigineqartassapput.

*Imm. 2.* Piumasaqaatit, tassungalu nukissiornerup minnerpaaffissaanut annerpaaffissaanullu aammalu erngup piiarneqartussap minnerpaaffissaanut annerpaaffissaanullu tunngasut ilanngullugit, tunngavigalugit atuinissamut akuersissutit nalunaarutigineqarsinnaapput.

*Imm. 3.* Atuinissamut akuersissutit kisermaassisinnaatitaaffiusumik, aammalu ukiut 60-it tikillugit piffissaliiffigineqarlutik tunniunneqartassapput, taamaattorli takuuk § 12, imm. 2.

*Imm. 4.* Imm. 3 malillugu atuinissamut akuersissutip piffissaq atuuffissaa, qinnuteqartup piffissaq eqqarsaatigalugu pisariaqartitatut uppersarsagai aallaavigalugit aalajangerneqassaaq.

### **Kapitali 3**

#### *Piumasaqaatit atugassarititaasullu*

§ 8. Atuinissamut akuersissutit taamaallaat piginneqatigiiffinnut imaluunniit aktianik piginneqatigiiffinnut, kiisalu ingerlatseqatigiiffeqariaatsinut assingusunut tunniunneqarsinnaavoq. Suliffeqarfik suliffeqarfimmi akuersissullu malillugu suliasaanut pisariaqartunik ilisimasaqassaaq aningaasaqarnikkullu tunuliaqutaqassalluni.

Ingerlatseqatigiiffik Kalaallit Nunaanni angerlarsimaffeqassaaq. Piffissaq akuersissuteqarfiusoq tamakkerlugu suliffeqarfiup imm. 1.-3-mi piumasaqaataasut naammassisimassavai, aammalu aningaasaatiminik atugassaqartitsissalluni, tassungalu ilanngullugu akiliisarnerninik unitsitsisimassanngilaq, akiliisinnaajunnaarsimassanngilaq imaluunniit pissutsinik tassunga sanilliunneqarsinnaasunik atugaqassanngilaq.

*Imm. 2.* Atuinissamik akuersissummik tunineqartoq aammattaaq erngup nukinganik innaallagissiorfimmik, atortunillu tassunga atasunik tamanik piginnittuussaaq, taakkunungalu ilaapput sapusiat, ikerasaliat, sulluliat, tasinnngortaliat, ruujorit, turbinit, pilersuinermit aqqusersuutit il.il., akuersissutitut nalunaarutigineqartoq naapertorlugu innaallagissiornermit atorneqartussat. Tassani pineqanngillat erngup nukinganik innaallagissiorfiit atortullu tassunga atasut Namminersorlutik Oqartussanit attartortinneqartut.

§ 9. Misissueqqaarnek atuinissarlu, taakkulu siunertaralugit iliuusissat aallartinneqartussat aallartinneqannginnerini, suliffeqarfimmut pilersaarut Naalakkersuisunit akuerineqassaaq.

§ 10. Suliffeqarfik, atuinissamut akuersissummik nalunaarfigineqartoq taamaallaat suliffeqarfimmit erngup nukinganut innaallagissiorfilimmik pilersitsisinnaavoq ingerlatsisinnaallunilu, taamaattorli takuuk imm. 2.

*Imm. 2.* Naalakkersuisut suliffeqarfiup, atuinissamut akuersissuteqarfigineqartup aamma suliffeqarfimmit attuumassuteqartumik allamik ingerlatsisinnaanissaanut akuersissummik nalunaaruteqarsinnaapput. Suliffeqarfiup attuumassuteqartup pilersinneqarnissaanut ingerlanneqarnissaanullu akuersissut, atuinissamut akuersissutip, tassani aalajangersakkat akuersissuteqarnissamullu atugassarititaasussat aalajangersarneqartut ilaattut aalajangersarneqassaaq.

§ 11. Erngup nukinganik isumalluutit innaallagissiornermut atorneqarnissaannut misissueqqaarnissamut atuinissamullu akuersinissamut piunasaqaatit pillugit Naalakkersuisut aalajangersaasinnaapput. Naalakkersuisut ilaatigut makku pillugit aalajangersakkanik aamma akuersissutinut atugassarititaasussanik aalajangersaasinnaapput:

- 1) innaallagissiaq atorneqartussamit sinneruttoq kiisalu innaallagissiap ilaa pisortat innaallagissamut aqqusersuutaat imaluunniit suleqataasut namminersortut aqqutigalugit pilersuinermit atorneqartoq.
- 2) akuersissummi piunasaqaatit aalajangersarneqartut naammassineqarsimanersut pillugu Naalakkersuisut pisinnaatitaaffimmillu pigisaqartup akornanni aqqiagiinngissutit isumaqatigiisitsiniartarnernut eqqartuussivimmut suliakkiissutigineqassasut, taassumalu aalajangiinera inaarutaasussaavoq,
- 3) misissueqqaarnermi suliasamik ilusilersuineq piffissamullu pilersaarut,
- 4) pisinnaatitaaffimmik pigisaqartup aqqiussuusaanikkut teknikkikkullu pisinnaasaanut uppersaaneq,
- 5) nalunaarusiortussaataaneq aamma qularnaveeqqusiissuteqarnissamut piunasaqaatit, aamma
- 6) avatangiisinik iluarseeqqinnissaq tamatumunngalu qularnaveeqqusiinissaq.

*Imm. 2.* Erngup nukinganik innaallagissiorfimmik, innaallagissiorfiup innaallagissiaata annersaa aatsitassarsiornermut atatillugu atorneqassappat, sananissamut ingerlatsinermullu akuersissut aatsitassarsiornermut sulianullu tamatumunnga tunngassuteqartunut Inatsisartut Inatsisaat (aatsitassarsiornermut inatsit) naapertorlugu Naalakkersuisunit nalunaarutigineqassaaq. Erngup nukinganik isumalluutinik atuinissamut akuersissut Inatsisartut inatsisaanni atuuttumi § 4, imm. 2 naapertorlugu aatsaat tunniunneqarsimappat, akuersissut taamaattoq nalunaarutigineqarsinnaavoq. Aalajangersakkat imaluunniit akuersissuteqarnissamut piunasaqaatit, imm. 1 imaluunniit Inatsisartut inatsisaanni maleruagassat allat naapertorlugit aalajangersarneqarsimasut aatsitassanik misissueqqaarnermut, misissuinermit atuinermullu, kiisalu tamatumunnga atatillugu erngup nukinganik innaallagissiorfimmik sananermut ingerlatsinermullu atatillugu Naalakkersuisunit saneqqunneqarsinnaapput.

*Imm. 3.* Pisinnaatitaaffimmik pigisaqartoq allallu, Inatsisartut inatsisaanni ilaatinneqartut, inatsit atuuttoq malillugu oqartussaasut suliaqarnerinut sunulluunniit atatillugu aningaasartuutinik akiliissapput. Akiligassat akitsuutit imaluunniit aningaasartuutinut utertitsinertut akilersinneqarsinnaapput. Sulianik suliaqarnermut imaluunniit oqartussaasut suliaqarnerinut atatillugu aningaasartuutaasut eqqarsaatigalugit akitsuutit aalajangerneqassapput, taakkununngalu nakkutilliinermit aammalu avataaniit siunnersorteqarnermut ikiorteqarnermullu aningaasartuutit ilaatinneqassapput.

*Imm. 4.* Pisinnaatitaaffimmik pigisaqartoq akiligassanik qanoq annertussusilinnik Namminersorlutik Oqartussanut akiliisassanersoq atuinissamut akuersissummi aalajangersarneqartassaaq. Tassunga ilanngullugu akiligassaq, erngup nukinganik isumalluutinut annertussusiliussa, akuersissummi ilaatinneqartoq (annertussutsimut akiliutit) tunngavigalugu, erngup nukinganik isumalluutinik atuneq aalajangersimasoq (atuinermit

akiliutit) tunngavigalugu imaluunniit innaallagissiaq tunisassiarineqartoq (tunisassiornermut akiliutit) tunngavigalugu naatsorsorneqartoq akilersinneqartoq aalajangersarneqarsinnaavoq. Kiisalu suliffeqarfimmi akuersissuteqarfiusumi aningaasaqarnikkut iluanaarutissanit (iluanaarutissanit akiliutit) Namminersorlutik Oqartussanut akiliuteqarnissamut piumasaqaatinik aalajangersaasoqarsinnaavoq.

*Imm. 5.* Pisinnaatitaaffimmik pigisaqartup sulisartunik kalaallinik atuinissaa pillugu akuersissuteqarnermut piumasaqaatinik aalajangersakkanillu Naalakkersuisut aalajangersaasinnaapput. Kisiannili suliffeqarfiup pisariaqartitsinera malillugu sulisartut piginnaaneqartut Kalaallit Nunaanni atugassaqartoqartinnagu pisinnaatitaaffimmik pigisaqartoq sulisartunik, Kalaallit Nunaata avataaneersunik atuisinnaavoq. Pisinnaatitaaffimmik pigisaqartup neqerooruteqarneni, pilersuinerni kiffartuussinernilu kalaallit suliffeqarfiutaannik atuinissaa pillugu akuersissuteqarnermut piumasaqaatinik aalajangersakkanillu Naalakkersuisut aalajangersaasinnaapput. Kisiannili kalaallit suliffeqarfiutaat teknikki niuernermilluunniit tunngaveqarluni ingerlatsinissaaq eqqarsaatigalugu unammillersinnaatinnagit suliffeqarfiit allat atorveqarsinnaapput.

*Imm. 6.* Pisinnaatitaaffimmik pigisaqartup pissutsinik teknikkimut, avatangiisinut isumaginninnermilu aningaasaqarnermut tunngasunik misissuisarnissaa naliliisarnissaalu pillugu akuersissuteqarnermut piumasaqaatinik aalajangersakkanillu Naalakkersuisut aalajangersaasinnaapput, ilanngullugit inuiaqatigiinni piujuartussamik iluaqutaasumik sunniuteqartitsinissaaq, tamanna pillugu nassuiaatinik suliaqartarnissaaq.

*Imm. 7.* Qanoq pisoqartillugu misissueqqaarnissamut atuinissamullu akuersissutit atorunnaarsinneqassanersut, imaluunniit Naalakkersuisunit utertinneqarsinnaanersut pillugu akuersissuteqarnermut piumasaqaatinik aalajangersakkanillu Naalakkersuisut aalajangersaasinnaapput. Akuersissummi aalajangersimasumi tamanna pillugu akuersissuteqarnissamut piumasaqaatit allanneqassapput, aammalu tamanna pillugu aalajangersagaasinnaasunut innersuussisoqassaaq.

## **Kapitali 4**

### *Atuinissamut akuersissutip isumaqatiginninniutigineqaqqittarnera*

§ 12. Atuinissamik akuersissummut piffissaliussap affaata ingerlareernerani akuersissummik pigisaqartoq aamma Naalakkersuisut piffissap atuinissamik akuersissuteqarfiusup naanerata kingorna piffissaaq atorveqartussaaq pillugu isumaqatiginninniarnernik aallartitsissapput. Taamaattorli akuersissutip atorunnaarnissaanut ukiut qulit sinnerunneranni aatsaat isumaqatiginninniarnernit aallartinneqartariaqarput.

*Imm. 2.* Atuinissamik akuersissutip ukiut 20-t tikillugit sivitsoqqinnissaanik Naalakkersuisut akuersissuteqarsinnaapput. Piumasaqaatit aalajangersarneqartut naammassineqarsimappata, piffissaaq akuersissuteqarfiusup ukiut 20-t tikillugit ilaqinneqarsinnaavoq. Piumasaqaatit aalajangersarneqartut naammassineqarsimappata, pisinnaatitaaffimmik pigisaqartup piffissap akuersissuteqarfiusup ukiut 20-t tikillugit sivitsorneqarsinnaaneranut pisinnaatitaaffeqarnera atuinissamut akuersissummi Naalakkersuisut nalunaarutigisinnaavaat.

*Imm. 3.* Atuinissamut akuersissutip piffissaq atuuffissaa tamarmiusoq ukiunit 80-init sivilunerussanngilaq.

*Imm. 4.* Atuinissamut akuersissutip naanerata kingorna piffissaq pillugu isumaqatigiissuteqartoqarsinnaanngippat, § 14, imm. 1 naapertorlugu erngup nukinganik innaallagissiorfik Namminersorlutik Oqartussat tigussagaat Naalackersuisut aalajangersinnaavaat.

**§ 13.** Piffissap atuinissamut akuersissuteqarfiusup naanissaa sioqqullugu erngup nukinganik innaallagissiorfiup Namminersorlutik Oqartussanut akeqanngitsumik tunniunneqarnissaa pillugu Naalackersuisut aamma atuinissamut akuersissummik pigisaqartoq isumaqatigiissuteqarsinnaapput.

## **Kapitali 5**

### *Tiguisinnaatitaaneq*

**§ 14.** Piffissap atuinissamik akuersissuteqarfiusup naanerani atorunnaarneraniluunniit, erngup nukinganik innaallagissiorfik Namminersorlutik Oqartussanut tunniunneqassasoq Naalackersuisut atuinissamut piomasaaqatini aalajangersinnaavaat imaluunniit aalajangiisinnaapput. Taamaattoqartillugu akuersissummik pigisaqartup erngup nukinganik innaallagissiorfik atortullu tassunga atasut, taakkunungalapupusiat, ikerasaliat, sulluliat, tasinngortaliat, ruujorit, turbinit, pilersuinermi aqqusersuutit il.il. ilanngullugit, kiisalu inissiat atortullu erngup nukinganik innaallagissiorfiup ingerlanneqarnerani atorineqartut, Namminersorlutik Oqartussanut tamakkiisumik pigineqartussanngorlugit akeqanngitsumillu tunniutissavai.

*Imm. 2.* § 7 naapertorlugu tiguisinnaatitaaneq, akuersissummik tunniussinermi aalajangersaavigineqartoq Kalaallit Nunaanni Eqqartuussivimmi nalunaarsorneqassaaq.

*Imm. 3.* Imm. 1 naapertorlugu tiguisinissap aalajangiunneqarneranut atatillugu Naalackersuisut aalajangiisinnaapput, erngup nukinganik innaallagissiorfik tamakkiisumik ingerlasinnaatillugu tunniunneqassasoq, tamatumani imaassimanngippat atugassarititaasut taamaattut atuinissamut akuersissummik pigisaqartumut naleqqutinngitsumik nammackersuutaalissasut.

*Imm. 4.* Inatsisartut inatsisaat manna naapertorlugu erngup nukinganik innaallagissiorfiup Namminersorlutik Oqartussanut tunniunneqarnissaa ukiunik pingasunik sioqqullugu, Namminersorlutik Oqartussat tiguisinissaannut pisariaqartunik piareersaateqarniarlutik, aammalu ataavartumik ingerlatsinerup ingerlaannarnissaa qulakkeerniarlugu tamakkiisumik akornusersorneqaratillu erngup nukinganik innaallagissiorfimmu atortuinullu tassunga atasunut Naalackersuisut isersinnaatitaassapput. Atuinissamut akuersissummik pigisaqartumut annertuumik akornutaanngitsumik aningaasartuutaanngitsumillu tamanna pissaaq.

*Imm. 5.* Erngup nukinganik innaallagissiorfik Namminersorlutik Oqartussanut tunniunneqanngippat, atuinissamik akuersissummik pigisaqartup sulini unitsissavaa, aammalu erngup nukinganik innaallagissiorfik, maleruagassanut Naalackersuisut

tamatumunnga aalajangersagaannut aammalu akuersissummi piumasaqaatinut aalajangersakkanut naapertuuttumik matusinissaq isumagissallugu.

*Imm. 6.* Tigusisinnaatitaanermut akuersissummi piumasaqaatinik aalajangersakkanillu ersarinnerusunik Naalackersuisut aalajangersaasinnaapput, tassungalu pissutsit imm. 1-5-imi taaneqartut ilaapput.

**§ 15.** § 14, imm. 1 naapertorlugu erngup nukinganik innaallagissiorfik tiguneqarpat, akiligassat nammagassallu erngup nukinganik innaallagissiorfiup pisussaaffigisai tamarmik atorunnaassapput.

**§ 16.** Erngup nukinganik innaallagissiorfimmik tiguneqartumik attartortitsinissamik Naalackersuisut isumaqatigiissuteqarsinnaapput. Inatsisartut inatsisaanni matumani aalajangersakkat naapertorlugit attartortoq atuinissamut akuersissummik nalunaarfigineqassaaq.

## **Kapitali 6**

### *Oqartussaasut suliarinnittarnerat*

**§ 17.** Misissueqqaarnissamut atuinissamulluunniit akuersissummik qinnuteqaat Naalackersuisunut tunniunneqassaaq.

*Imm. 2.* Suliaq Inatsisartut inatsisaanni matumani pineqartunut ilaasoq oqartussaasumit ataatsimit ingerlanneqassasoq Naalackersuisut aalajangersinnaavaat, aammalu ingerlatsinerup ingerlanneqarnissaa pillugu Inatsisartut inatsisaanni matumani killissarititaasut iluanni sukumiinerusunik maleruagassiorsinnaallutik.

*Imm. 3.* Inatsisit oqartussaasut allat piginnaatitaaffiisa ataanni inissisimasut ataqqillugit, sumiiffiit akuersissummut ilaatinneqartut iluini avataannilu suliffeqarfinnik suliassanillu, Inatsisartut inatsisaat manna naapertorlugu ilaatinneqartunik ingerlatsinissamut aalajangersakkanik akuersissuteqarnissamullu piumasaqaatinik Naalackersuisut aalajangersaasinnaapput.

**§ 18.** Misissueqqaarnissamut atuinissamullu akuersissummik tunniussinissaq sioqqullugu kommunit kalluarneqartussat oqaaseqaateqartinneqassapput, aammalu oqartussat attuumassuteqartut oqaaseqartinneqassallutik. Oqaaseqaammik tunniussinissamut sivikinnerpaamik sapaatit akunnerinik sisamanik Naalackersuisut piffissaliissapput.

**§ 19.** Akuersissummik qinnuteqartut aamma akuersissummik pigisaqartut paasissutissat, Inatsisartut inatsisaat, maleruagassat taanna tunngavigalugu aalajangersarneqartut aammalu akuersissuteqarnermi piumasaqaatit naapertorlugit oqartussaasutut suliaqarnerminni Naalackersuisut pisariaqartinneqartutut isumaqarfigisaat tamaasa Naalackersuisunut nalunaarutigisussaavaat.

*Imm. 2.* Paasissutissanik nalunaaruteqartarnissamut maleruagassanik Naalackersuisut aalajangersaasinnaapput, taakkunungalu paasissutissat allagaatinik

takunnissinnaatitaanermut maleruagassanut ilaatinneqannginnissaannut maleruagassat ilaatinneqarput.

## **Kapitali 7** *Nakkutilliineq*

§ 20. Inatsisartut inatsisaat manna naapertorlugu pisinnaatitaaffimmik pigisaqartup sulineranik Naalackersuisut nakkutilliisuussapput, aammalu Inatsisartut inatsisaata kiisalu maleruagassat piunasaqaatillu Inatsisartut inatsisaat tunngavigalugu aalajangersarneqartut malinneqarnissaannik peqqusisinnaallutik.

*Imm. 2.* Naalackersuisut eqqartuussisup aalajangiineranik tunngaveqanngikkaluarlutik ilisarnaammik atorsinnaasumik takutitsinikkut suliap nakkutigineqarnissaanut pisariaqartitsineq tunngavigalugu suliffeqarfimmi immikkoortunut tamanut isersinnaatitaassapput.

*Imm. 3.* Akuersissummik pigisaqartup piffissaliussap naleqquttup iluani peqqussut naammassinngippagu, piginnittup akiligaanik annasaqaatigisinnaasaanillu peqqussutaasoq Naalackersuisunit naammassineqarsinnaavoq.

## **Kapitali 8** *Aalajangersakkat allat*

§ 21. Misissueqqaarnissamut imaluunniit atuinissamut akuersissut Kalaallit Nunaanni Eqqartuussivimmi nalunaarsorneqassaaq.

*Imm. 2.* Misissueqqaarnissamut imaluunniit atuinissamut akuersissummik allamut tunniussineq sunaluunniit, toqqaannartumik toqqaannanngitsumilluunniit pisoq, Naalackersuisunit akuersissutigineqassaaq. Naalackersuisut atugassarititaasut Naalackersuisunit aalajangersarneqartut tunngavigalugit tunniussinissamut siunooortumik akuersissummik pisinnaatitaaffimmik pigisaqartoq nalunaarfigisinnaavaat.

*Imm. 3.* *Imm. 2* naapertorlugu erngup nukinganut akuersissutip tunniunneqarnissaanut akuersinermut atatillugu, aamma nunaminertanut sanaartugassanullu il.il., erngup nukinganut akuersissummut ilaatinneqartunut, pilersaarusiornermut nunaminertanillu atuinermut inatsit naapertorlugu akuersissutit tunniunneqarnissaannut Naalackersuisut akuersissapput. Naalackersuisut akuersinissamut piunasaqaatinik aalajangersaasinnaapput.

§ 22. Pisinnaatitaaffimmik pigisaqartoq ajoqusikkanut, suliffeqarfimmi sulianiluunniit akuersissummi pineqartuni piliarineqartunut taarsiinissamut maleruagassat nalinginnaasut malillugit taarsiisussaataavoq, inatsisini allani akisussaaffiup ingerlaqqinnissaa allassimangippat.

*Imm. 2.* Pisinnaatitaaffimmik pigisaqartup taarsiisussaataaerata sillimasiissummik allatulluunniit qularnaveeqqusiissummik matussuserneqarsimanissaa pillugu akuersissummi piunasaqaatini Naalackersuisut aalajangersaasinnaapput.



*Imm. 3.* Entreprenørit, pilersuisut kiffartuussisullu kiffartuussinerat suliffeqarfimmi suliamiluunniit, Inatsisartut inatsisaat manna naapertorlugu akuersissummut ilaatinneqartuni atorneqarnerat naapertorlugu, taarsiisussaataitanerisa sillimmasiissummik allatulluunniit qularnaveeqqusiissummik matussuserneqarsimanissaat pillugu aalajangersakkanik Naalackersuisut aalajangersaasinnaapput.

§ 23. Susassaqanngitsut erngup nukinganik innaallagissiorfimmut sumiiffimmullu akuersissummut atasumut inunnit angalaarfigineqarnissaa immikkut ulorianaateqarsinnaasumut isersinnaanissaat pinngitsoorniarlugu iliuousissat pisariaqartut, atuinissamik akuersissummik pigisaqartup isumagissavai.

## **Kapitali 9**

### *Pinngitsaaliissummik taarsiinertalimmik pigisanik piginnikkunnaarsitsineq*

§ 24. Erngup nukinganik isumalluutininik misissueqqaarnerup atuinerullu naammassinnaanut pisariaqartutut isigineqarpat, Naalackersuisut pinngitsaaliissummik taarsiinertalimmik pigisanik piginnikkunnaarsitsisinnaapput. Pinngitsaaliissummik taarsiissutitalimmik pigisanik piginnikkunnaarsitsineq, pinngitsaaliissummik taarsiissutitalimmik pigisanik piginnikkunnaarsitsineq pillugu Inatsisartut inatsisaanni maleruagassat malillugit pissaaq.

## **Kapitali 10**

### *Pineqaatissiissutaasinnaasut*

§ 25. Pinerluttulerinermut inatsimmi pineqaatissiissutaasinnaasut malillugit pineqaatissiisoqarsinnaavoq,

- 1) akuersissummik pigisaqarani suliassanik § 1-imi ilaasunik ingerlatsisunut,
- 2) Inatsisartut inatsisaanni maleruagassanik unioqqutitsisunut,
- 3) Inatsisartut inatsisaat imaluunniit aalajangersakkat Inatsisartut inatsisaat naapertorlugu aalajangersarneqartut naapertorlugit piumasagaatinik nalunaarutigineqartunik unioqqutitsisunut,
- 4) § 20, naapertorlugu, aalajangersakkat Inatsisartut inatsisaat naapertorlugu aalajangersarneqartut naapertorlugit, imaluunniit akuersissuteqarnermut piumasagaatit naapertorlugit peqqussutinik malinninngitsoortunut, imaluunniit
- 5) paasissutissanik eqqunngitsunik salloqittaalluniluunniit tunniussisunut, imaluunniit paasissutissanik § 6, imm. 1, § 19, imm. 1 naapertorlugu imaluunniit inatsisartut inatsisaat tunngavigalugu aalajangersakkat aalajangersarneqarsimasut akuersissuteqarnermulluunniit piumasagaatit naapertorlugit oqartussaasup piumasarisaaanik nipangiussisunut.

*Imm. 2.* Unioqqutitsisoq suliffeqarfuppat, tamakkiisumik ilaannaasumilluunniit Namminersorlutik Oqartussanit, kommunimit imaluunniit kommunit suleqatigiiffiannit, aktianik piginneqatigiiffimmit, pigisaqatigiiffimmit, piginneqatigiiffimmit, assigisaannilluunniit pigineqartoq, suliffeqarfik il.il. taamatut akisussaatinneqarsinnaavoq.

Taamatutaaq unioqutitsisut tassaappata Namminersorlutik Oqartussat, kommunit imaluunniit kommunit suleqatigiiffiat, aamma tamanna atuutissaaq.

*Imm. 3.* Aalajangersakkani Inatsisartut inatsisaat manna naapertorlugu aalajangersarneqartuni maleruagassanik unioqutitsinerit pinerluttulerinermut inatsimmi maleruagassat naapertorlugit pineqaatissiinermik imaluunniit akiliisussanngortitsinermik kinguneqarsinnaasoq aalajangersarneqarsinnaavoq.

*Imm. 4.* Maleruagassanik, Inatsisartut inatsisaat naapertorlugu aalajangersarneqartunik unioqutitsineq suliffeqarfimmit, tamakkiisumik ilaannaasumilluunniit Namminersorlutik Oqartussanit, kommunimit imaluunniit kommunit suleqatigiiffiannit, aktianik piginneqatigiiffimmit, pigisaqaqatigiiffimmit, piginneqatigiiffimmit assigisaannilluunniit pigineqartumit piliarineqarpat, tamanna pinerluttulerinermut inatsit naapertorlugu pineqaatissiisoqarsinnaanera aalajangersarneqarsinnaavoq, tassungalu akiliisussanngortitsisarneq arsaarinnittarnerlu ilaatinneqarput. Taamatutaaq pinerluttulerinermut inatsit naapertorlugu pineqaatissiisinnaaneq pillugu maleruagassanik aalajangersaasoqarsinnaavoq, tassunga ilaallutik unioqutitsinerup Namminersorlutik Oqartussanit, kommunimit imaluunniit kommunit suleqatigiiffiannit piliarineqarnerani akiliisussanngortitsisarneq arsaarinnittarnerlu.

*Imm. 5.* Akileeqqusissutit Nunap Karsianut tutsinneqassapput.

**§ 26.** Unioqutitsineq aningaasaqarnikkut iluanaarutaasimappat, iluanaarutit Kalaallit Nunaanni Pinerluttulerinermut Inatsit naapertorlugu arsaarinnissutigineqassapput. Arsaarinnittoqarsinnaanngippat, akiliisitsissutissap annertussusilerneqarnerani tamanna immikkut isiginiarneqassaaq.

*Imm. 2.* Arsaarinnissutit Nunap Karsianut iluaqutissanngortinneqassapput.

## **Kapitali 11**

### *Atuutilersitsineq il.il.*

**§ 27.** Inatsisartut inatsisaat 1. august 2014-imi atuutilissaaq. Tamatuma peqatigisaanik Erngup nukingata innaallagissiornermut atorneqartarnera pillugu Inatsisartut inatsisaat nr. 12, 1. december 2009-imeersoq atorunnaarsinneqassaaq.

*Imm. 2.* Inatsisartut inatsisaata atuutilernerani erngup nukinganik isumalluutinik misissueqqaarnissamut atuilernissamulluunniit akuersissutaareersimasut, Inatsisartut inatsisaannut pineqartumut ilaasut, piffissami akuersissuteqarfiusumi atuutiinnassapput. Taakkua manna tikillugu inatsit atuuttoq naapertorlugu maleruagassaqaartinneqaannassapput.

*Namminersorlutik Oqartussat, ulloq 8. juni 2014*

  
Aleqa Hammond